

Carlo Chiesa

Cun i P A T R I Z I da Ciass

ul 23 da gennar 1993

Ghe stremizi
cari P a t r i z i
al su, che spetti una puesia,
ma k'è dumà una rima la mia
una ciciarada a la bona.
Parli a la carlona
e par mia sbagliass
parli dal nost Ciass !

L'è un gran paés, stu tocch da terra
né miserii, né guerra
l'han mai suterraa,
anzi, l'hann furmaa
l'hann ingrandii in quantità,..
d'un böcc han fai una città.

Nüm Ciasses i ma ciaman nebiatt
- però sem né stüpid né matt -
e da tanti ann, semm ammò,
di veri e simpatich Momò !

Da dopu che ghem un puu da cultura
la mettum gio un puu düra ,
ma l'è una cunsulaziun . .
cun cuncert e espusiziun
alzum sü da la nebbia ul nivel
e l'è appunto lì ul bel !

U guardaa ben da visin
 ul libar növ " Inscì l'era ul Tisin ";
 gh'è sü ul Ciass d'una volta;
 gh'era la Faloppia, al post da Via Volta,
~~gh'era~~ sü la strada che va a Balerna
 gh'è sü la mia cà paterna....
 Sü i marciapè e la riscziata
 sa camminava in mezz la strada
 e a la sira serumm amis
 di lanterni a gas cumè a Paris,
 e anca se sa vör mia,
 vegn adoss la nustalgia.

Mò, o ben o maa
 ul nost Ciass al s'è sviluppa.
 Da chi e un puu, par i nost vecc,
 gh'è un palazzun sotta tecc
 (preferaria però dumà guardal
 e mia duvé frequental ...).
 Cun un puu da grass da rost
 anca ul teatar al sarà nost;
 ma par la piscina coperta
 a ga vörarà un bela cuverta....
 A gh'è piü la mia cà dal Bruschet
 ma gh'è ammò ul Grozt dal Linet.
 I nost bosch indré a pettinai
 -- a fa bel tütt, sa finiss mai --
 ma l'è una necessità
 ormai Ciass l' è una città .

Al post di Culonn, invece d'un asilo
 vöran fa sü, sura e sott, un silo
 andà a pè, al cumincia a fa pagüra
 ma ul centru al farà bela figura.

Ul nost Foot-ball al giüga ben,
 ma l'è mia bun da fa fen,
 forsi in la prossima stagiun
 al sarà un puu men cujun.

Ul cumün, cui so finatiz
 al sarà bun da tirrà innanz....
 e i dannee da büttà via
 i a trüvarà, cui sacc da pulizia....

A ghà saria ammò robb da cünta sü,
 ma vöri mia fa ul dapiü,
 ul püssee impurtant l'è da regurdass
 che sem baloss e patrizi da Ciass
 e che fin ch'el mund al gira
 - malgrado l'aria amerigrama che tira -
 sperém che l'ann a pena incuminciaa
 al naga mia maa.
 Auguri a tütti da ritruvass
 l'ann che vegn, sani e salvi
 in dal nost Ciass.